

الفاجومي

## ناس في أرميدان

- ليلة القدر في عنبر «ب» بسجن أرميدان .
- مزيج الدكتور لعلاج آلام المساجين .
- اكتشفت في السجن الشاعر الي أصبح بعد كده حديث الناس .



obseikan.com

عنبر كله سمع  
واحد يا ورد  
اتنين يا فل  
ثلاثه يا ياسمين  
أربعه يا أجدع ناس معلمين  
خمسه يا كركيه  
سته يا زهرة الشباب والحركه الوطنيه  
سبعه يا سجن النسا ومخالف الشريعه الإسلاميه  
ثمانيه يا باشا  
تسعه يا أجدع ناس حشاشه  
عشره يا فرن يا حلم الجعان  
حداشر يا مستشفى العفن والدود  
والداخل مفقود والخارج مولود.  
اتناشر يا مشنقه.. يا مرجيحه الأبطال!  
سلالم السجن  
سبعين سلمه وكسور  
عدى على الهوى  
وأنا سلمى مكسور



زندان وزان  
وزوايع الأحزان  
سَجْتُمْ حَبِيبِي  
وعملوني عليه سجان



تلات سنين يا أرميدان.. م العصر للعصر يقفلوك علىّ ويناموا.. مفرمه حديد  
عجنت عضمي على لحمي على جلدی.. ورجعت شكلتني من جديد.

زمان الصبا ولىّ  
وشاب الشعر مادريت  
والقوس منى انحنى  
بعد الصبا ماوريت  
وادی السنان اتخلعت  
حتى الضروس مادريت

بدأت أصحى.. وأشوف الناس والأمور والأشياء بعين تانيه.. زمان قبل السجن  
لما قرئت ديوان بيرم التونسي وسمعت ألحان سيد درويش وزكريا أحمد ما كنتش  
معجب!

كنت مبهور بشوقي وعبد الوهاب وبأى شىء فيه ريحه أوروبا المكرمه.. كانت  
فيه حاجه ربنا يكفيك شرها اسمها «جراة الجاهل» دى كانت لابسه جتتى  
ومكلبشاني زى الشيخ محمد الجريحي اللى لابس جتته زينب مرات خالى عطيه  
ومطلع عليها البلا.

طول النهار أتعالم وانفلسف اسفّه عشاق شعر بيرم وألحان سيد درويش وزكريا  
أحمد.. باعتبارها حاجات بلدى.. وأنا راجل أفرنجي أبأ عن جد!

ثم إيه حكاية فنان الشعب اللي ورموا دماغنا بيها دي؟ وشعب إيه الخافي ده؟  
شعب جبان وخانع طول عمره وراضى بالذل ويستاهل جميع ما يجرا عليه!  
الكلام ذا وأكثر منه كان بيقلهولى محمد أخويا.. وأنا كنت طبعاً باصدقه.. مش  
أخويا الكبير؟.. بعد السجن اتعلمت وفهمت.. يا بنت الإيه يا مصر.. أتاريكى  
حكاية طويله مالهاش أول من آخر!



سجن أرميدان «بالعامية المصرية».. أو قره ميدان «بالفصحى التركيبة» كان عبارة عن ثلاث عتابر.. عنبر ألف.. وعنبر ب.. وعنبر ج.

كل عنبر س عبارة عن أربعة أدوار.

الدور الأول والثاني عبارة عن ١٢٨ زنزانه صغيره.. يعنى كل دور منهم ٦٤ زنزانه سعة خمسة برش الدورين الثالث والرابع عبارة عن اثنين وتلاتين أوضه كبيره سعة عشرين برش.

هى دى لوائج السجن.

لكن عنبر ب بقى كان مخالف لكل اللوائج والقوانين زى ميكروباس الدويقه.. إداره السجن كانت مخصصاه لمساجين - تحت التحقيق - وهو ده اللي حطه داخل حزام مشكله الإسكان وأزمه الأماكن بسبب عدم سرعة الفصل فى القضايا لعدم وجود دوائر قضائيه كفايه.. ودى كانت زمان اسمها مشاكل التحول الاشتراكى ودلوقتى اسمها مشاكل التحول للاقتصاد الحر والخصخصة.. (وكل واحد حر يسمى مشاكله زى ما هو عايز).

أيامها يا سيدى بقى فضل البوليس - اللي كان فى خدمة الشعب - يقبض ع المتهمين من أبناء الشعب ويحول ع النيابة والنيابه تحول ع القضاء والقضاء يحول على عنبر ب وعنبر ب زى الطربه ما بيردش ميت لحد ما الزنزانه خمسه برش بقى فيها عشرين والأوضه عشرين برش بقى فيها تمانين.

وياريت المشكله كان باين لها حل، إلا كل يوم كانت بتتعدد أكثر.

كان فيه على ذمة التحقيق ناس بقى لهم تمانين شهر وأكثر.

شحته الاسكندراني بتاع تزييف العملة الفضه كان بقى له تحت التحقيق ثلاثه وثمانين شهر وكان الأستاذ عبد الرسول مدرس الرياضيات كل ما يشوفه يقول لى:

- الراجل ده يفكرنى بليلة القدر اللى هى - خيرٌ من ألف شهر-.

وكان دائماً بيداعبه ويقول له:

- يا بختك يا عم شحته حتشوف ليلة القدر في عنبر ب.

وكان الأستاذ جاد السوداني يقول لى:

- والله يا بن عمى عنبر ب ده يفكرنى بزربة الميرغنى عندنا فى أم درمان.. وحتى

فى زربة الميرغنى البهايم ما ينوموا فوج بعضهم.

وانتشرت الأمراض المعدية.. نتيجة سوء التهويه والتغذية وانعدام الرعاية الطبيه..

مستشفى السجن ماكانش فيه غير برميل خشب كبير زى اللى فى معمل الطرشى..

مليان مزيج أبيض.. فكان الدكتور يكتب على تذكره المريض مهما كان مرضه..

كاس مزيج.. وعشان يخلى مسئوليته كان بيصمم على إن المريض لازم يشرب

الكاس قدامه!

مره على الصعيدي المحبوس تحت التحقيق بعد ما سرق منبر الجامع فى بلدهم..

نزل للدكتور بيشكى من آلام فى رجلية وكالعاده كتب له الدكتور كاس مزيج وقال

له:

- إشرب.

قال له:

- ع يضيع الودع ده يا دكتور؟

قال له:

- وأنا مغسل وضامن جنه يا روح أمك.

على الصعيدي خدها من قصيره راح دالق الكاس على رجلية فدخلوه التأديب

واتحكم عليه بست جلادات ع العروسه بتهمه إهانته السيد/ طيب السجن.

بعد الحادثه دى كتبت زجل عن حال المساجين وقلته فى الندوه الأسبوعيه

وبخصوص الرعاية الطبيه قلت:

والطبيب له شهره ذاعت

م المحيط

إلى الخليج

لو تقول له الجزمه ضاعت

برضه يكتب

كاس مزيج



وكانت ذورة المأساه هي موت عدد كبير من الشباب فتكت بيهم الأمراض وسوء التغذية وانعدام الرعاية الطبيه.. حسنى بشله الهجم اللى كان واخذ بطولة السجنون فى سباق خمس تلاف متر جرى والأستاذ نبيل مترى الباحث الاجتماعى.. وإبراهيم الطحطاوى اللى جاي فى جريمة قتل عمد دفاعاً عن الشرف.. والأستاذ محمد علوى مساعد المخرج اللى كان بيحلم بإخراج فيلم سينمائى عن عنبر ب ويدينى فيه دور البطولة والأستاذ عبد الرسول المدرس اللى فجأه كح دم وما استحملش ثلاث تيام وفى اليوم الرابع صحينا الصبح على صوت شحته الاسكندرانى وهو بيكي ويقول: - أيوه يا جدعان.. الأستاذ عبد الرسول مات.. يا حول الله يا ربي.. إنا لله وإنا إليه راجعون.

يومها سيطر على السجن الذهول.. مع إنه ماكانش أول واحد يموت.. لكن الأستاذ عبد الرسول الخدوم الرقيق المهذب أثر فى الناس كلها وكان أشد الناس حزنًا على الأستاذ عبد الرسول هو عم برهومه عبد الشهيد جاره ع البرش والمتهم فى قضية تزيف عمله ورقه وترويجها فى السويس.

صحيت مره بالليل على صوت نهننه مكتومه واكتشفت إن مصدر الصوت هو برش عم برهومه اللى كان متغطى بالبطانية ودافس دماغه تحت الغطا.. اتسحبت عشان ما اصحيش حد وزحفت على نمره عم برهومه أظمن عليه وإذا بيه بيقول وهو بيكي:

- جُدع زى قطفه الورد يا ولده راح فى شربة ميه.. يا حسره قلب أمه عليه.  
رجعت بسرعه قبل أعصابى ما تخونى ودفنت دماغى تحت البطانيه وانفجرت  
بالبكا.



فى خلال التلات سنوات اللى قضيتهم فى عنبر ب فى سجن أرميدان اتقلبوا  
علينا طباط تولوا قياده العنبر كان أقربهم لقلوب المساجين على اختلاف أوضاعهم  
وأسباب سجنهم الرائد سمير قلاده غطاس الأديب الفنان اللى كان له عدة  
محاولات فى كتابه القصة والروايه.

الراجل ده كان دائماً فاتح مكتبه وقلبه للمساجين وأحياناً جيبه.  
وكان الثانى النقيب عزت زعتر ودا كان راجل فى حاله كأنه مش موجود..  
صحيح كان جسمه فى العنبر.. لكن دماغه ومشاعره كانوا فى حتة تانيه.. الله أعلم  
بقي كانوا فين؟

وكان تالت الطباط الرائد «.....» وأنا مش ح أشرفه بذكر اسمه هنا.. لأنه كان  
مش بنى آدم.. كابتن كوره تافه معجب ببذلته ودبايره.. شخص قاسى متسلط  
مريض حاقد على صنف البشر وكان إحساسه بالنقص مسيطر على تصرفاته  
الغريبه.. مثلاً كان يحلله إنه ينزل المساجين المرضى من المستشفى ليلة ميا ييات  
نوبتشى فى حوش السجن واللى مايقدرش يجرى يخلى السجنانه يمدوه ويضربه  
على رجليه بالكرباج أو الخزرانه لغاية ما يغمى عليه.

وأحياناً كان ينزل كل المساجين العنبر ويقعدهم على قرافيصهم أطول وقت ممكن  
واللى يخسع ورجليه ما تشيلهوش ويقع لازم ينضرب على ركبته بالشومه عشان  
تانى مره تحرم ركبته ما تشيلهوش.

وكانت أمجاده اللى هارش دماغنا بيها إنه قتل مجموعة المسجونين السياسيين فى  
أوردى أبو زعبل وكان دائماً يذكر اسم واحد كل مره ويقول عنه «الواد» اللى كان  
عامل لى زعيم ما استحلمش غلوه فى إيدي.

الشخص ده اسمه شهدى عطيه الشافعى واللى عرفت بعد كده إنه كان مفتش أول اللغة الإنجليزية بوزاره التربيه والتعليم وإنه كان صديق شخصى للرئيس جمال عبد الناصر اللى كان موجود فى يوغسلافيا أثناء اغتيال صديقه على يد الرائد المعجبانى كابتن الكوره الهايف المريض.

